



საჯარო სამართლის იურიდიული პირი
**სამცხე-ჯავახეთის სახელმწიფო
 უნივერსიტეტი**



Legal Entity Public Law
SAMTSKHE –JAVAKHETI STATE UNIVERSITY
აკადემიური საბჭო ACADEMIC COUNCIL

ოქმი № 15 „ 31 „ 10 2018წ

დადგენილება № 67

სსიპ სამცხე-ჯავახეთის სახელმწიფო უნივერსიტეტის განათლების, ჰუმანიტარულ და სოციალურ მეცნიერებათა ფაკულტეტის დოქტორანტურისა და სადისერტაციო საბჭოს დებულებაში ცვლილებების შეტანის შესახებ

„უმაღლესი განათლების შესახებ“ საქართველოს კანონის 21-ე მუხლის პირველი პუნქტის „ლ“ ქვეპუნქტებისა, საქართველოს ზოგადი ადმინისტრაციული კოდექსის 51-ე მუხლის პირველი ნაწილის, 52-ე მუხლის პირველი და მე-2 ნაწილების, 53-ე მუხლის მე-3 ნაწილისა და 63-ე მუხლის, „საჯარო სამართლის იურიდიული პირის – სამცხე-ჯავახეთის სახელმწიფო უნივერსიტეტის წესდების დამტკიცების თაობაზე“ საქართველოს განათლებისა და მეცნიერების მინისტრის 2014 წლის 13 მაისის N52/ზ ბრძანებით დამტკიცებული წესდების მე-8 მუხლის პირველი პუნქტის „ი“ ქვეპუნქტებისა და აკადემიური საბჭოს 2013 წლის 2 ოქტომბრის N51 დადგენილებით დამტკიცებული აკადემიური საბჭოს რეგლამენტის მე-3 მუხლის პირველი პუნქტის „უ“ ქვეპუნქტების თანახმად აკადემიური საბჭო ადგენს:

1. შეტანილ იქნეს ცვლილება აკადემიური საბჭოს 2013 წლის 25 დეკემბრის N69 დადგენილებით დამტკიცებულ სსიპ სამცხე-ჯავახეთის სახელმწიფო უნივერსიტეტის განათლების, ჰუმანიტარულ და სოციალურ მეცნიერებათა ფაკულტეტის დოქტორანტურისა და სადისერტაციო საბჭოს დებულებაში და დებულების მე-12 მუხლი ჩამოყალიბდეს შემდეგი რედაქციით:

„მუხლი 12. დისერტაციის დაცვისათვის მომზადება

12.1 დისერტაციის დასაცავად სადისერტაციო საბჭოს წარედგინება შემდეგი მასალები და საბუთები:

- ა) სადოქტორო პროგრამის ფარგლებში მოპოვებული კრედიტების შესახებ დოქტორანტის მიერ შევსებული ფორმა, დადასტურებული სამეცნიერო ხელმძღვანელის და დამტკიცებული სადისერტაციო საბჭოს მიერ;
- ბ) სამცხე-ჯავახეთის სახელმწიფო უნივერსიტეტის პლაგიატის დამდგენი კომისიის დასკვნა
- გ) სადისერტაციო მაცნის (ქართულ და ინგლისურ ენებზე) ელექტრონული და ბეჭდური სახით;

სადისერტაციო მაცნე უნდა მოიცავდეს შემდეგ ინფორმაციას:

- ნაშრომის ზოგადი დახასიათება
 - საკვლევი თემის აქტუალობა და მნიშვნელობა;
 - კვლევის მიზანი;
 - მეცნიერული სიახლე;

- o ნაშრომის წყაროთმცოდნეობითი ბაზა;
- o ნაშრომის პრაქტიკული მნიშვნელობა;
- o წინასწარი განხილვის ოქმის რეკვიზიტები;
- ნაშრომის მოკლე შინაარსი;
- სადისერტაციო თემის ირგვლივ გამოქვეყნებული სტატიების ნუსხა;

დ) დისერტაციის ელექტრონული და ოთხი აკინძული ეგზემპლარი;

ე) დოქტორანტის ხელმძღვანელის დასაბუთებული დასკვნა;

ვ) დისერტაციის დაცვამდე დისერტანტს კვლევის სფეროში გამოქვეყნებული უნდა ჰქონდეს მინიმუმ სამი სამეცნიერო პუბლიკაცია, რომელთა შორის აუცილებელია ერთი სტატია მაინც გამოქვეყნებული იყოს იმპაქტ-ფაქტორის მქონე peer-reviewed ჟურნალში ან მიღებული იყოს დასაბეჭდად (გამოქვეყნებული სამეცნიერო სტატიების წარდგენისას აუცილებელია წარმოდგენილ იქნას პერიოდიკის ყდის, შინაარსის და თავად ავტორის მიერ დაწერილი სტატიის ქსეროასლი; სამეცნიერო სტატიის ინტერნეტ გამოცემის ფორმატში წარდგენისას აუცილებელია მითითებულ იქნას ინტერნეტ გამოცემის მისამართი, ინტერნეტ გამოცემის პირველი გვერდის, სარჩევისა და თვითონ სტატიის ამონაბეჭდი). სადისერტაციო საბჭოს მიერ დამტკიცებული ნუსხის გარდა საქართველოსა და უცხოეთში გამომავალ სხვა ჟურნალებში გამოქვეყნებული სამეცნიერო ნაშრომების აღიარების საკითხს სადისერტაციო საბჭო განიხილავს ყოველ კონკრეტულ შემთხვევაში.

12.2. დისერტაციის დაცვის აუცილებელი წინაპირობაა სადისერტაციო ნაშრომის შეფასების პროცესის ინტერნაციონალიზაცია, რაც გულისხმობს, რომ დოქტორანტმა უნდა დააკმაყოფილოს ქვემოთ წარმოდგენილი ერთ-ერთი მოთხოვნა მაინც:

- ა) დოქტორანტს ჰყავს უცხოელი ხელმძღვანელი/თანახელმძღვანელი;
- ბ) ფაკულტეტის სადისერტაციო საბჭო უზრუნველყოფს დოქტორანტის სადისერტაციო თემაზე გამოქვეყნებული/გამოსაქვეყნებლად გადაცემული ერთი სტატიის ან დისერტაციის შემოკლებული ვერსიის (30-45 გვერდი) საერთაშორისო რეცენზირებას;
- გ) უცხოურ ენაზე თარგმნილი დისერტაციის შემოკლებული ვერსიის (30-45 გვერდი) გაგზავნა უცხოეთის წამყვან უნივერსიტეტებსა და სამეცნიერო-კვლევით ცენტრებში, რომელთა ნუსხას ადგენს სადისერტაციო საბჭო;

დ) მონაწილეობა საერთაშორისო კონფერენციაში/სიმპოზიუმში/კონგრესში.

სადოქტორო პროგრამით შეიძლება განისაზღვროს დისერტაციის წარდგენასთან დაკავშირებული დამატებითი მოთხოვნები.

12.4 დოქტორანტის მიერ სადისერტაციო საბჭოსთვის ყველა სავალდებულო საბუთის ჩაბარების შემდეგ, ერთი თვის ვადაში ხდება საბუთების გადამოწმება და შესაძლო ნაკლოვანებების აღმოჩენის შემთხვევაში დოქტორანტისთვის მათ გამოსასწორებლად შესაბამისი გონივრული (მაქსიმუმ ერთ თვემდე) ვადის მიცემა.

12.5 საბუთების სრულყოფილად წარდგენის შემთხვევაში, სადისერტაციო საბჭო ნიშნავს დისერტაციის დაცვის თარიღს, ამტკიცებს დარგობრივ კოლეგიას და ნიშნავს ორ/სამ რეცენზენტს, რომელთა შორისაც ერთი მაინც უნდა იყოს უნივერსიტეტიდან. რეცენზენტები უნდა იყვნენ დისერტაციის კვლევის სფეროში დოქტორის ხარისხის მქონე პირები. რეცენზენტებს ურიგდებათ დისერტაციის მთლიანი ტექსტი. დარგობრივი კოლეგიის წევრებს გადაეცემათ სადისერტაციო მაცნე.“

2. დადგენილება ძალაშია ხელმოწერისთანავე.

3. დადგენილება განთავსდეს სსიპ სამცხე-ჯავახეთის სახელმწიფო უნივერსიტეტის ვებ-გვერდზე და ჩაბარდეს შესაბამის ფაკულტეტებს.

4. დადგენილება შეიძლება გასაჩივრდეს დაინტერესებული პირის მიერ კანონმდებლობით დადგენილი წესით გაცნობის დღიდან ერთი თვის ვადაში ახალციხის რაიონულ სასამართლოში, მისამართზე ქ. ახალციხე, კ. მეზაღიშვილის ქ. N62.

აკადემიური საბჭოს თავმჯდომარე,
რექტორი, ასოცირებული პროფესორი

ქ. 

მაკა ბერიძე